

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

सपन्याह

१ इ सँदेसा अहइ जेका यहोवा सपन्याह क दिहस। सपन्याह इ सँदेसा तब पाएस जब आमोन क पूत योसियाह यहूदा क राजा रहा। सपन्याह कूसी क पूत रहा। कूसी गदल्याह क पूत रहा। गदल्याह अमर्याह क पूत रहा। अमर्याह हिजकियाह क पूत रहा।

लोगन क निआव करइ क यहोवा क दिन

२ यहोवा कहत ह, “मई देस क हर चीज क पूरी तरह नस्ट कइ देबउँ। ३ मई सबहिं लोगन क अउर सबहिं जनावरन क नस्ट करवेउँ। मई अकास क चिरइन अउ सागरे क मछरियन क नस्ट करवेउँ। मई पापी लोगन क अउर ओन सबहिं चीजन क जमीन पइ स नाउँ निसान मेट देबउँ।” यहोवा इ सब कहेस।

४ यहोवा कहेस, “मई यहूदा अउ यरूसलेम क वासिइन क खिलाफ आपन हाथ उठाउब। मई इ जगहन स उ सबइ क हटाइ देब जउन अबहुँ तलक लबार देवता बाल क पूजा करत ह। अउर उ याजकन क नाउँ क जउन बाल क सेवा करत ह। ५ मई ओन सबहिं लोगन क हटाइ देब जउन आपन छते स तारन क पूजा करत ह, अउर उ लोगन क जउन यहोवा क नाउँ क किरिया खात हउँ, किन्तु फुन उ पचे लबार देवता मोलेक क किरिया खात ह। ६ कछू लोग यहोवा स विमुख होइ गएन। उ पचे मोरे पाछे रहब तजि दिहेन। उ पचे यहोवा स मदद माँगब भी बंद कइ दिहेन। एह बरे मई ओन लोगन क उ जगहिया स हटाउब।”

७ मोर सुआमी यहोवा क समन्वा चुप रहा! काहेकि लोगन क निआव करइ बरे यहोवा क दिन हाली ही आवत अहइ। यहोवा आपन भेंट बलि तइयार कइ लिहस ह अउर उ आपन बोलाए भए मेहमानन क तइयार कइ लिहस ह।

८ यहोवा कहेस, “यहोवा क बलि क दिन, मई राज पुत्रन अउर दूसर प्रमुखन क राजा देबउँ। मई दूसर देसन क ओढ़नन क पहिरइ वालन क सबहिं लोगन क सजा देबउँ। ९ उ दिना मई ओन सबहिं लोगन क सजा देबउँ जउन अन्धविस्वास क देहलीज पइ कूदत हीं। मई ओन लोगन क सजा देबउँ जउन सुआमी क घरे क कपट अउर हिंसा स बटोरे भए धने स भरत हीं।”

१० यहोवा इ भी कहेस, “उ दिना, लोग यरूसलेम मँ मछरी-दुआरे पइ मदद बरे गोहरावत रहा

होइहीं। सहर क दूसर हीसन मँ लोग नरियात रहा होइहीं अउर लोग सहर क चारिहुँ कइती क पहाड़ियन मँ चिजियन क नास होइ क जोरदार आवाज अनकत रहा होइहीं। ११ तू खाले नगर क निवासियो विलाप करा! काहेकि बड़पारियन क रोक दीन्ह जाइहीं। अउ धनी बड़पारी बरबाद कइ दीन्ह जइहीं।

१२ “उ समइ, मई दिआ लइके समूचई यरूसलेम मँ ओनका खोजत रहब। मई ओन सबहिं लोगन क हेरब जउन कि दाखरस क तलछट क नाई अहइ। उ पचे कहत ह, ‘यहोवा कछू नाहीं करत ह, न अच्छा अउर न ही बुरा।’ १३ तब दूसर लोग ओनकर सारी सम्पत्ति लइ लेइहीं अउर ओनकर घरन क बरबाद करिहीं। उ समइ जउन लोग घर बनाए होइहीं, उ पचे ओनमाँ नाहीं रइहीं अउर जउन लोग अंगूरे क बेलन क खेते मँ रोपे होइहीं, उ पचे ओन अंगूरन क दाखरस नाहीं पीइहीं, ओन चीजन क दूसर लोग लइ लेइहीं।”

१४ यहोवा क निआव क दिन हाली आवति अहइ। उ दिन निअरे अहइ, अउर तेजी स आवति अहइ। यहोवा क निआव क खास दिन लोग चिचिआन भवा सुर सुनिहीं। हिआँ तलक कि वीर जोधा भी चिचिअइहीं। १५ उ समइ परमेस्सर आपन किरोध परगट करी। उ खौफनाक विपत्तियन क समइ होइ। उ विध्वंस क समइ होइ। उ करिआ, भए बादर अउर तूफानी दिन क अधियारा क समइ होइ। १६ इ दिन सैनिकन क किलाबंध नगरन अउर रच्छा-मीनारन पइ हमला क तुरही स भरा भवा होब्या।

१७ यहोवा कहेस, “मई लोगन क जिन्नगी बहोत दूभर कइ देबउँ। लोग ओन आँधरन क नाई चारिहुँ कइती जइहीं जेनका इ भी मालूम नाहीं कि उ पचे कहाँ जात अहइ? काहेकि उ सबइ लोग यहोवा क खिलाफ पाप किहेन। अनेक लोग मारि डावा जइहीं। ओनकर खून जमीने पइ बही। ओनकर ल्हासियन गोबरे क नाई भुइँया पइ पड़ी भई सड़त रही। १८ ओनकर सोना चाँदी ओनकर मदद नाहीं कइ पाई। उ समइ, यहोवा बहोतइ छुब्ध अउ कोहान होइ। यहोवा पूरे संसार क आपन किरोध क आगी मँ बारिके बरबाद कइ देइ। यहोवा पूरी तरह भुइँया पइ सब कछू बरबाद कइ देइ।”

यहोवा लोगन क प्रेरित करत ह

२ निर्लज्ज लोगो, मुरझात अउ मरत फूलन क नाई होइ क पहिले, २ आपन जिन्नगी क

बदलि द्या। दिन क गर्मी मँ कउनो फूल मुरझाई अउर मरि जाइ। तू पचे वइसेन होब्या जब यहोवा आपन खउफनाक किरोध परगट करी। एह बरे आपन जिन्नगी क, यहोवा क जरिये तोहरे पचन क खिलाफ किरोध परगट करइ क पहिले, बदल डावा।^३ तू सबहिं विनम्र लोगो, यहोवा क लगे आवा। ओकर नेमन क माना। नीक काम करब सीखा। विनम्र होइ सीखा। होइ सकत ह तब तू पचे सुरच्छित रहि सकब्या जब यहोवा आपन किरोध परगट करी।

यहोवा इस्राएल क पड़ोसियन क सजा देइ

१ अज्जा सहेरे मँ कउनो भी नाही बची। अस्कलीन बरबाद कइ दीन्ह जाइ। दोपहेरे तलक लोग असदोद तजइ क मजबूर कइ दीन्ह जइहीं। एक्रोन सूना होइ।^२ हे समुदर-तट पड़ बसइया लोगो अउर करेती लोगो, यहोवा क इ संदेसा सिर्फ तोहरे बरे अहइ। हे कनान देस, पलिस्ती देस, मइ तू पचन्क बर्बाद कइ देब। हुआँ कउनो नाही रही।^३ समुदर क किनारे क तोहार पचन क भुइया बिना किसी नगरन या खेतन क बंजर रही। तोहार भुइया सिर्फ गडेरियन अउ भेड़िन बरे खुला चरागाह रही।^४ तब उ भुइया यहूदा क बचे भए लोगन क बरे होइ। यहोवा यहूदा क ओन लोगन क याद रखी। सबइ लोग बिदेस मँ बंदी अहइ। मुला यहोवा ओनका वापस लिआइ। तब यहूदा क लोग ओन खेतन मँ अपनी भेड़िन क घास चरइ देइहीं। साँझ क उ पचे अस्कलोन क खाली घरन मँ ओलरिहीं।

^५ यहोवा कहत ह, “मइ जानत हउँ कि मोआब अउ अम्मोन क लोग का किहेन। उ सबइ लोग हमरे लोगन क लज्जित किहेन। उ सबइ लोग आपन देस क अउर जियादा बड़वार करइ बरे ओनकर भुइया लिहेन।^६ एह बरे जइसा कि मइ सदोम अउर अमोरा क सजा दिहेस ह। मइ मोआबी अउ अम्मोनी क भी सजा देब। मइ सर्वसक्तीमान यहोवा, इस्राएल क परमेस्सर अहउँ। मइ प्रतिग्या करत हउँ कि उ सबइ देस सदा क खातिर पूरी तरह बरबाद कइ दीन्ह जइहीं। ओनकर भुइया मँ जंगली घास जमिहीं। ओनकर भुइया मृत सागर क नोन स ढकी भइ भुइया जइसी होइ। मोरे लोगन मँ स बची भइ उ भुइया क अउ एहमाँ तजी गइ हर चीज क लेइहीं।”

^{१०} उ सबइ बातन, मोआब अउ अम्मोन बरे घटित होइहीं काहेकि उ पचे सर्वसक्तीमान यहोवा क लोगन क लज्जित किहेन।^{११} उ सबइ लोग

यहोवा स डेरइहीं। काहेकि यहोवा ओनकर देवतन क बरबाद करी। तब सबहिं दूर-दराज क देस यहोवा क उपासना करिहीं।^{१२} कूस क लोगो, एकर अरथ तू पचे भी अहा। यहोवा क तरवार तोहरे लोगन क मारि डाइ।^{१३} अउर यहोवा उत्तर कइँती आपन हाथ बढ़ाई अउ अस्सूर क सजा देइ। उ नीनवे क बरबाद करी, उ सहर खाली झुरान रेगिस्तान जइसा होइ।^{१४} तब सिर्फ भेड़िन अउ जंगली जनावर उ बरबाद सहर मँ रइहीं। कुचकुचवा अउर कउआ ओन खंभन पड़ बइठिहीं जाउन खड़ भएन तजि दीन्ह ग अहइ। ओनकर आवाज खिड़कियन स आवति भइ सुनाइ पड़ी। कउअन, दुआरे क सीढ़ियन पड़ बइठिहीं। ओन सूने घरन मँ करिआ पंछी बइठिहीं।^{१५} नीनवे एन दिनन एतना जियादा घमण्डी अहइ। उ अइसा खुस सहर अहइ। लोग समुझत हीं कि उ पचे सुरच्छित अहइ। उ पचे समुझत हीं कि नीनवे संसार मँ सब से बड़का ठउर बाटइ। मुला उ सहर बर्बाद कीन्ह जाइ। इ एक ठु सूनी जगहिया होइ, जहाँ सिर्फ जंगली जनावर आराम करइ जात हीं। जब लोग ओहर स गुजरिहीं अउर लखिहीं कि केतनी बुरी तरह सहर बरबाद कीन्ह ग अहइ, तब उ पचे सीटी बजइहीं अउर मूँड़ हिलइहीं।

यरूसलेम क भविस्स

^३ १ यरूसलेम, तोहार पचन क लोग परमेस्सर क खिलाफ लड़न। तोहार पचन क लोग दूसर लोगन क चोट पहुँचाएन अउर तू पचे पापे स कलंकित अहा।^२ तोहार लोग मोर एक ठु नाही सुनतेन। उ पचे मोर सिच्छा क अंगीकार नाही करतेन। यरूसलेम यहोवा मँ बिस्सास नाही राखत। यरूसलेम आपन परमेस्सर क लगे नाही आवत ह।^३ यरूसलेम क प्रमुख गुरांत भवा सिंहन जइसेन अहइ। एकर निआव क जज अइसे भुखान भेड़ियन क तरह अहइ जउन भेड़िन पड़ हमला करइ साँझ क आवत ह, अउर भिसारे कछू बचा नाही रहत।^४ ओकर नबियन जिम्मेदार अउर बिस्सासयोग्य नाही अहइ। ओकर याजकन पवित्तर चिजियन क अपवित्तर करत हीं। उ पचे परमेस्सर क नेम बरे हिंसा किहेन ह।^५ मुला परमेस्सर अबहुँ भी उ सहर मँ बाटइ अउ उ ओनके बरे लगातर निआव स भरा रहा ह। परमेस्सर कछू भी बुरा नाही करत। उ अपने लोगन क भलाइ करता चला आवत ह। लगातार हर भिसारे उ आपन लोगन क संग निआव करत ह। मुला बुरे

लोग आपन कीन्ह भए बुरे करमन बरे लज्जित नाहीं होतेन।

६ परमेस्सर कहत ह, “मई समूचे रास्टरन क बरवाद कइ दिहेउँ ह। अई ओनकर रच्छा-मीनारन क नस्ट किहेउँ ह। मई ओनकर सबइ सड़क क नस्ट किहेउँ ह अउर अब हुआँ कउनो नाहीं जात। ओनकर नगरन सूना अहई, ओनमाँ अब कउनो नाहीं रहत। ७ मई तू पचन्स इ एह बरे कहत हउँ ताकि तू पचे सिच्छा ल्या। अगर तू पचे अइसा करब्या तउ तोहार पचन क घर नस्ट नाहीं होइ। अगर तू पचे अइसा करब्या तउ मई आपन बनाई भइ योजना क अनुसार तू पचन क सजा नाहीं देबउँ।” मुला उ पचे बुरे लोग वइसेन ही बुरे करमन अउर जियादा करइ चाहत हीं जेनका उ पचे पहिले ही कइ रखे अहई।

८ यहोवा कहेस, “एह बरे तनिक प्रतीच्छा करा। मोर खड़ा होइ अउ निआव कीन्ह जाइ स पहिले मोर प्रतीच्छा करा। अनेक रास्टरन स लोगन क लिआवइ अउ तू पचन क सजा देइ बरे ओनकर उपयोग आपन किराध तू पचन क खिलाफ परगट करइ बरे करब। मई ओनकर उपयोग इ देखावइ बरे करबउँ कि मई केतना छुब्ब हउँ, अउर यहूदा क समूचा प्रदेस नस्ट होइ। ९ तब मई दूसर रास्टरन क लोगन क बदल देव एह बरे उ साफ-साफ बोलइ सकब अउर यहोवा क नाउँ क तारीफ कर सकब। उ पचे सबइ एक संग मोर अराधना करब। १० लोग कूस मैं दूसर कइती स पूरी राह तय कइके अइहीं। मोरे बिखरे भए लोग मोरे लगे अहइ। मोर उपासक मोरे लगे अइहीं अउर आपन भेंट लइहीं।

११ “यरूसलेम, तब तू अगवा चलिके ओन बुरे करमन बरे लजाव होइ बंद कइ देब्या। काहेकि मई यरूसलेम स ओन सबहिं बुरे लोगन क निकारिके बाहेर करब। मई ओन सबहिं घमण्डी लोगन क दूर कइ देबउँ। ओन घमण्डी लोगन मैं स कउनो भी मोरे पवित्तर पर्वते पड़ नाहीं रही पाइ। १२ मई सिरिफ सोझ अउ विनमर लोगन क आपन सहर मैं रहइ देबउँ अउर उ पचे यहोवा क नाउँ मैं बिस्वास करिहीं। १३ इस्राएल क बचे भए लोग बुरे करम नाहीं करिहीं। उ पचे लबार नाहीं बोलिहीं। उ पचे लबार बोलिके लोगन क टगइ नाहीं चइहीं। उ पचे

ओन भेड़िन क नाई होइहीं जउन खात हीं अउर सान्त ओलरत हीं, अउर कउनो भी ओनका तंग नाहीं करी।”

आनन्द सँदेसा

१४ हे यरूसलेम, गावा अउ खुस ह्वा!

हे इस्राएल, खुसी स घोस करा!

यरूसलेम, प्रसन्न ह्वा, तमासा करा।

१५ काहेकि यहोवा तोहार पचन क सजा रोकि दिहस।

उ पचे तोहरे पचन क दुस्मनन क वापिस मोड़ द्या जउन तोहार तरफ आवत रहेन।

हे इस्राएल क राजा, यहोवा तोहरे संग अहइ।

अब तू पचन्क अउर कउनो बुरी घटना बरे चिन्ता क जरूरत नाहीं।

१६ उ समइ, यरूसलेम स कहा जाइ,

“मजबूत बना, डेराअ जिन!

१७ तू पचन क परमेस्सर यहोवा तू पचन क संग अहइ।

उ सक्तीसाली फउजी क नाई अहइ।

उ तू पचन क रच्छा करी।

उ देखाई कि उ तू पचन स केतना पियार करत ह।

उ देखाई कि उ तू पचन स केतना प्रसन्न अहइ।

उ हँसी अउर तू पचन क बारे मैं अइसे खुस होइ।

१८ जइसे लोग दावत मैं होत हीं।

यहोवा कहेस, “मई तू पचन्क लज्जा क दूर करब।

मई तू पचन्क दुर्भाग्य क तू पचन्स दूर करब।

१९ उ समइ, मई ओन लोगन्क सजा देबउँ जउन तू पचन्क चोट पहाँचाएन।

मई आपन घायल लोगन्क रच्छा करब।

मई ओन लोगन्क वापस लिआउब, जउन पराइ क बेबस कीन्ह ग रहेन

अउर मई ओनका प्रसिद्ध करब।

लोग सब जगह ओनकर तारीफ करिहीं।

२० उ समइ, मई तू पचन्क वापस लिआउब।

मई तू पचन्क एक साथ वापस लिआउब।

मई तू पचन्क प्रसिद्ध बनाउब।

सब जगह लोग तू पचन्क तारीफ करिहीं।

इ तब होइ जब मई तू पचन्क अँखियन क समन्वा तू सबइ बन्दी लोगन्क लिआउब।”

यहोवा इ सबइ कहेस।